



Ika-Kawhaag-Pito nga Dominggo
sa Kasarangang Panahon
Oktubre 5, 2014

Ma-Dominggong Tamdanang Liturhikal alang sa Simbahan sa Kabus sa Diwa sa Bag-ong Ebanghelisasyon

Ang Simbahan sa Kabus, pinaagi sa Gagmayng Simbahanong Katilingban, maka-ambit gayud pag-ayo sa pungkay sa kinabuhing Kristiyano pinaagi sa buhat sa kagawasan sa kabus!

Ang ikatulong bahin sa pamalandong sa PKP - II bahin sa iyang panglantaw sa usa ka Simbahan nga Gibag-o nagtutok sa Pagkadisipulo diha sa Katilingban. Matud pa sa PKP-II:

“K. Ang Pagkadisipulo sa Katilingban – Ang Simbahan

(87) Sa sinugdanan sa atong mga pamalandong, ang atong sukaranang pangutana mao kini: unsaon man nato pagpuyo isip mga Kristiyanong Katoliko dinhi niining kahimtanga karon. Ang pangutana nato karon mao: sa unsang paagiha nga kita isip usa ka Simbahan molihok ug manginlabut sa atong kalibutan? Unsang matanga kita sa pagka-Simbahan aron masagubang

gayud nato ang hagit sa atong katilingban sa pagsulod nato sa ikatulong milenyo?

(88) Ang tubag niini dili hataw. Kay kini modala kanato balik ngadto sa konkreto ug tataw nga modelo sa unang mga Kristohanong katilingban nga, gipadilaab sa gugma ni Jesus ug dinasig sa iyang pulong ug Espiritu, nanagtigum sa pagsimba, sa pag-ampo, sa pagpakig-ambit ug sa pag-alagad .

Kadtong unang modelo may programa alang sa tahas sa pag-aninag sa Simbahang nabag-o.”

Kini matulon-anon kon, niini nga Dominggo, kita mohunong sa makadiyot aron sa pagtuon ug pagpamalandong sa matang sa kalibutan nga atong gipuy-an, ma-lokal , ma-rehiyon, ma-nasud ug ma-tibuok kalibutan . Unsang mga hagita sa kalibutan ang atong gisagubang karon? Bug-at kini nga tahas. Apan kinahanglang mogahin kita ug paghinuktok bahin niining pangutanaha. Mamahimo nato kana, una, sa personal ug tinagsa-tagsa, ug unya isip grupo, usa ka GSK. ■

RITO SA PAGSUGOD

Diha sa imong kabubut-on, O Ginoo, ang tanang mga butang natukod, ug walay bisan kinsa nga makasukol sa imong kabubut-on . Kay ikaw ang nagbuhat sa tanang mga butang, ang langit ug ang yuta, ug ang tanan nga gipahigayon diha sa langit; ikaw ang Ginoo sa tanan.

P: Sa ngalan sa Amahan ug sa Anak ug sa Espiritu Santo.

K: *Amen.*

P: Ang Ginoo maanaa kaninyo.

K: *Maanaa usab kanimo.*

Pasiuna ug Pag-abi-abi

P: Mga igsoon: Kita mao ang bag-ong ubasan sa Ginoo. Atong pangayoon sa atong Dios karon nga panalanginan kita isip iyang mga katawhan ug mga mamumuo sa iyang parasan: nga ato untang hatagan ug bili ang atong giambitang pagkatawo, hiniusang maglihuk alang sa usa kagiambitang mabungahong yuta ug maamomahong kalibutan ug malipayong magmartsa ngadto sa usa ka komon nga padulngan sa tawo.

Akto sa Paghinulsol

P: Mga igsoon: andamon nato karon ang atong kaugalingon sa pagsaulog niining talagsaong misteryo sa gugma ug kaluwasan. Pangayoon nato karon ang pasaylo sa Dios kay siya mao ang Dios sa gugma ug kalooy.

P: Ginoong Jesus, kami mao ang bag-ong ubasan sa Amahan. Pasayloa kami sa mga kapakyasan sa pag-atiman sa among yuta ug kalibutan. Ginoo, kaloy-i kami.

K: *Ginoo, kaloy-i kami.*

P: Ginoong Jesus, kami naningkamot pag-ayo sa pagsundog kanimo pinaagi sa pagtrabaho alang sa usa ka mas maayong kinabuhi, malinawon ug walay kabalaka. Pasayloa kami sa paghunahuna nga kining proyektoha amo ra gayud. Kristo, kaloy-i kami.

K: *Kristo, kaloy-i kami.*

P: Ginoong Jesus, kami ang mga mamumuo sa bag-ong ubasan sa Amahan. Pasayloa

kami sa among kapakyasan sa pag-apil diha sa mga proyekto sa kabus alang sa hustisya, kagawasan ug kalinaw. Ginoo, kaloy-i kami.

K: *Ginoo, kaloy-i kami.*

P: Kaloy-an unta kita sa Dios nga makagagahum sa tanan ug pasayloon ang atong mga sala, dad-on unta kita niya ngadto sa kinabuhing dayon.

K: *Amen.*

Himaya sa Diyos didto sa langit...

Kolekta

P: Mag-ampo kita: Labing gamhanan ug buhing Diyos, nga diha sa kadagaya sa imong kalumo gilampasan mo ang mga ganti sa maayong buhat ug mga tinguha sa mga tawo nga nangaliyupo kanimo, ibubo ang imong kaluoy kanamo aron sa pagpasaylo sa gikahadlok sa tanlag ug sa paghatag sa gihangyo nga wala mapangahasi sa pag-ampo. Kini among gipangayo pinaagi sa among Ginoong Jesukristo imong anak, nga buhi ug hari uban kanimo ug sa Espiritu Santo, Diyos nga usa hangtud sa kahangturan.

K: *Amen.*

LITURHIYA SA PULONG

Unang Pagbasa: Isaias 5: 1-7

L: Pagbasa gikan sa Unang Basahon Propeta Isaias

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa Isaias 5: 1-7:

Ang ubasan mao ang usa ka espesyal nga luna sa yuta alang sa mga tawo sa karaang Haduol nga Silangan. Kini giatiman sa espesyal nga paagi aron kini makahatag ug batakang suplay sa pagkaon alang sa usa ka pamilya. Kining lunaa sa yuta usa usab ka kabilin nga nagdugtong sa identidad sa usa ka banay. Busa, kini naghubit sa mga katungod isip lungsoranon sa maong dapit. Sa katapusan, ang mga katigulangan gilubong niining yutaa. Dinhi, ang ubasan, ang usa ka luna sa yuta, nagsimbolo sa Israel. Ang Dios

mao ang iyang tag-iyá. Apan ang yuta naglimbong sa Ginoo: napakyas kini sa paghimo sa iyang gitinguha nga mga bunga. Kini pagasilotan sa kalaglagan tungod sa iyang mga sala: ang in hustisya ug pagpanglupig sa kabus mibunga ug mga pagpaagas sa dugo ug kabangis.

Salmo Responsoryo: Salmo 80: 9, 12, 13-14, 15-16, 19-20

(Basahon gikan sa Kasulatan)

Komentaryo sa Salmo 80:

Kini mao ang usa ka salmo sa pagminatay ug tiningub nga pangamuyo. Adunay pagpalahi tali sa mga panghitabo sa nangagi ug sa karon. Ang karon usa ka masakit nga kasinatian (bb. 4-7); bb. 9-12 naghisgot sa mahimayaong kagahapon sa ubasan. Ang ubasan mao ang Israel; ang nagdala paggawas sa mga punoan sa paras gikan sa Egipto mao ang Ginoo. Ang bb. 13-14 halos usa ka pagpadayag sa usa ka kiha atubangan sa hukmanan batok sa Ginoo: nganong imong giguba ang mga kuta niini, ug misangput kini sa pagka-tukbononon sa mga langyaw ug sa mga mananap? Ang bb. 15-16 mao ang usa ka paghangyo ug panabang; bb. 19-20 nagpakita ug usa ka mang-aawit nga nagsalig sa Dios, ang iyang manluluwas.

Ikaduhang Pagbasa: Taga-Filipos 4:6-9

L: Ang Pagbasa Gikan sa Sulat ni San Pablo ngadto sa mga Taga-Filipos

(Basahon gikan sa Kasulatan)

L: Ang Pulong sa Ginoo.
K: *Salamat sa Dios.*

Komentaryo sa Taga-Filipos 4:6-9:

Panapos na ang sulat ni Pablo. Ang paborito niyang tema, kalinaw, gisubli na usab dinhi sama sa sinugdanan sa sulat. Ang Kristiyano, samtang naghulat sa

katapusang ugma pinaagi sa aktibong gugma ug panaghiusa sa iyang silingan, ilabi na sa kabus, malinawon ug wala’y kabalaka. Kay aduna siya’y Dios nga kapaingnan. Aduna usab siya’y pananglitan sa pagsunod kang Cristo Jesus – ang kinabuhi ug mga buhat ni Pablo: sa pagkab-ot kanunay sa pinakamaayo diha sa tanang buhat, subay sa atong Ginoong Hesukristo.

Berso sa Aleluya:

L: **Aleluya, aleluya.** R: **Aleluya, aleluya!** Gipili ko kamo gikan sa kalibutan , nag-ingon ang Ginoo, aron manglakaw ug makahimo’g mga bunga nga magpabilin! L: **Aleluya, aleluya.**

Ebanghelyo: Mateo 21: 33-43

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo sumala ni San Mateo.

K: *Himayaon ikaw, O Ginoo.*

(Basahon gikan sa Kasulatan)

P: Ang Ebanghelyo sa Ginoo.

K: *Daygon Ikaw, O Kristo.*

Komentaryo sa Mateo 21: 33-43:

Gipadayag sa Dios ang iyang kaugalingon ug iyang kabubut-on diha sa konkretong kasaysayan sa tawo. Siya milihok diha sa kalibutan ginamit ang materialidad sa kalibutan ug ang lawasnong estruktura sa kinabuhing tawhanon. Gipili niya ang Israel nga iyang pribilehiyadong paborito nga mga tawo alang sa unang yugto sa iyang pagpadayag sa kaugalingon. Sa diha nga ang Israel wala mosunod sa iyang mga paagi, iyang gipadala kanila ang iyang mga propeta, nga nagpahinumdom kanila sa Kasabutan, nga mobalik sa Ginoo ug mag-usab sa ilang mga paagi. Apan gipatay hinoon sila sa mga pangulo sa Israel.

Apan, ang pagkamaunungon sa Dios ngadto sa Kasabotan uban sa iyang katawhang Israel wala magduhaduha, wala matandog. Hilabihang gugmaha niya sa kalibotan nga iyang gipadala ang iyang bugtong Anak, manununod sa iyang Ginghamian, sa pagtawag sa iyang mga katawhan nga iyang gi-angkon nga iyaha! Apan usab, gipatay sa mga pamunoan ug ang mga katigulangan sa yutaang iyang anak ug manununod.

Ang duso sa Daang Kasulatan nahimong matuod diha sa Bag-o: ang misyon sa Israel, ang misyon sa Anak mao ang pagpakig-ambit niining relihiyosong kasinatian uban sa tanan nga mga nasud aron nga sila unta motuo sa Dios ug mosunod sa iyang kabubut-on. Kining malukpanong misyon adunay karon usa ka partikular nga kinaiya: gitumong karon dinhi dili kaayo kadtong mga liderato kundili kadtong mga biktima sa ilang kaugalingong pangagamhanan ug awtoridad – ang kabus, sa gilapasan. Sila – ang kabus, ang gilapasan, ang mga biktima sa in hustisya ug pagpahimulos - mao karon ang mga manununod sa ginghamian sa Anak, ang bugtong manununod. Ang nagharing hut-ong wala nay tinuod nga gahum ug awtoridad batok sa kabus ug sa linupigan, gawas lamang pinaagi sa pagpugos ug kabangis. Ang mga naulahi gawasnon na karon. Ingon nga bag-ong katawhan sa Dios ug mga lungsoranon sa iyang Ginghamian, sila mopili sa pagpuyo sa gawas ba o bisan batok sa mga katilingbanong pagkontrola nga gipahamtang sa mga utlanang burgis nga nag-alagad lamang sa pipila ug nag-ulipon sa kadaghanan .

Busa, ang unang Kristohanong katilingban ug ang atong Simbahan sa modernong kalibutan nahiusa diha sa kinabuhi ug misyon sa Anak: sa pagsangyaw sa Paghari sa Dios “dili kaayo sa iyang dogmatikong pagtulon-an apan sa paglihok alang sa kalingkawasan sa kabus ug sa mga nadisiridar niining kalibutana.” (Luis Alonso - Schoekel, La biblia de nuestro pueblo). Ug si Jesus nagdapit kanato karon sa pagpuyo sa usa ka bag-ong kinabuhi. Ang mga sugyot,

mga tudling-pulong ug mga pormula sa kinsa ang Diyos ug kon unsa ang gugma dili makaluwas kanato. Hinonoa, kita naluwas ni Jesus, ang aktibong mahigugmaon ug ulipon sa katawhan. Busa kita moadto kaniya, ingon nga siya moduol kanato, pinaagi sa paghigugma ug pag-alagad kaniya diha sa kabus ug sa mga timawa... kay ilaha na ang Ginghamian.

Wali: Ang Simbahan sa Kabus, pinaagi sa Gagmayng Simbahanong Katilingban, maka-ambit gayud pag-ayo sa pungkay sa kinabuhing Kristiyano pinaagi sa buhat sa kagawasan sa kabus!

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/Panawagan/Hagit
Ang Simbahan sa Kabus, pinaagi sa Gagmayng Simbahanong Katilingban, maka-ambit gayud pag-ayo sa pungkay sa kinabuhing Kristiyano pinaagi sa buhat sa kagawasan sa kabus!	Unsa’y imong gitan-aw nga imong pag-apil sa mga buhat sa kagawasan sa kabus? Aduna bay mga proyekto diha sa inyong GSK ug parokya nga nagpausbaw sa kagawasan sa kabus? Nganli kini. Nganong kini buhat man sa kagawasan sa kabus?	Ang atong mga modelo mao ang “unang Kristohanong mga komunidad, gipadilaab sa gugma ni Jesus ug gidasigi sa iyang pulong ug Espiritu, nanagtigum sa pagsimba, sa pag-ampo, sa pagpakig-ambit ug sa pag-alagad” diha sa yuta!

Padayag sa Pagtoo

P: Nagatoo ako...

K: ...Sa Dios ang Amahan ang makagagahum sa tanan, Magbubuhat sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga

Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Katilingbanong Pag-ampo Katilingbanong Pag-ampo

P: Mga igsoon, ato karon ibayaw ang atong mga kasingkasing sa mapahiubsanong pag-ampo ngadto sa atong langitnong Amahan, nga madagayaon sa kalumo ug kaluoy. Sa matag pag-ampo ang atong tubag: ***Ginoo, dasiga kami sa pag-apil sa kagawasan sa kabus.***

T: Ginoo, dasiga kami sa pag-apil sa kagawasan sa kabus.

L: Mag-ampo kita alang sa Simbahan: nga isip Simbahan sa Kabus sa tibuok kalibutan, siya unta malig-on pinaagi sa Espiritu Santo sa iyang pagpaningkamot siya sa pagsunod sa pinkamaayong Kristohanong kinabuhi pinaagi sa pag-apil sa buhat sa kagawasan sa kabus ug sa mga nadis-iridar. Mag-ampo kita sa Ginoo.

T: Ginoo, dasiga kami sa pag-apil sa kagawasan sa kabus.

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip Katawhan sa Dios: nga, pinaagi sa ilang panig-ingnan sa pagsundog kang Kristo, sila unta magpausbaw sa mga programa nga makatabang sa pagwagtang sa kakabus, pagpausbaw sa maayong pagdumalang panggobyerno ug sa

maayong pagkalumulupyo ug sa pag-atiman sa palibot ug sa ekolohiya isip propetikong pagpatuman sa mensahe sa ebanghelyo ug pagtulonang Katoliko. Mag-ampo kita sa Ginoo.

T: Ginoo, dasiga kami sa pag-apil sa kagawasan sa kabus.

L: Alang sa tanang pangulo sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga sila unta magpadayon sa pagpausbaw sa kaayohan sa tanan pinaagi sa paghatag ug balay sa walay balay, yuta ngadto sa walay yuta, trabaho sa mga walay trabaho, edukasyon sa mga dili makabasa pinaagi sa mga balaod sa makiangayong ekonomiya ug gahum nga nagasunod sa bagong ubasan sa Ginoo. Mag-ampo kita sa Ginoo.

T: Ginoo, dasiga kami sa pag-apil sa kagawasan sa kabus.

L: Alang kanatong tanan, mga lumulupyo sa kalibutan ug sakop sa kalangitan: nga magdinasigay unta kita sa paghanduraw ug sa pagtukod sa usa ka kaugmaon diin ang tanan mahimong manag-igsoon, gawasnon sa pagsimba sa iyang Dios sa walay kahadlok, nagsuporta sa usag usa diha sa ilang mga kalipay ug kagulangan ug bukas sa pagtukod ug usa ka komunidad pinaagi sa lawom nga pagbinaloay sa pagkatawo, sa pagtoo ug sa mga pamaagi sa paghunahuna ug pagpuyo. Mag-ampo kita sa Ginoo.

T: Ginoo, dasiga kami sa pag-apil sa kagawasan sa kabus.

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

T: Ginoo, dasiga kami sa pag-apil sa kagawasan sa kabus.

L: Alang sa atong mga espesyal nga mga tinguha, sa kahilom sa atong tagsa-tagsa ka kasing-kasing, (*mohilum kadiyot*) Mag-ampo kita sa Ginoo.

T: *Ginoo, dasiga kami sa pag-apil sa kagawasan sa kabus.*

P: Ginoong Dios, ania ang mga pag-ampo sa imong katawhan nga nagtigum libot sa imong halaran karon. Padayona ang pagdasig kanamo sa pagpuyo sa labing maayong Kristohanon ug Katolikong kinabuhi, sumala sa imong kabubut-on. Kini among gipangayo pinaagi ni Kristo among Ginoo.

T: Amen.

LITURHIYA SA EUKARISTIYA

Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

K: Daygon ang Dios hangtod sa kahangturan.

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.

K: Daygon ang Dios hangtod sa kahangturan.

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.

Pag-ampo Alang sa Mga Halad

P: Dawata, O Ginoo, kami naga-ampo, ang mga halad nga gitukod sa

imong mga sugo ug, pinaagi sa sagrado nga mga misteryo, nga among gisaulog uban sa katungdanan sa pag-alagad, madagayaong hingpita ang makabalaang buhat nga pinaagi niini ikaw mahimuot sa pagtubos kanamo. Pinaagi kang Kristo nga among Ginoo.

K: Amen.

Prepasyo

P: Ang Ginoo maanaa kaninyo.

K: Maanaa usab kanimo.

P: Ibayaw ang inyong mga kasingkasing.

K: Amo nang gibayaw ngadto sa Ginoo.

P: Magpasalamat kita sa Ginoong atong Dios.

K: Angay ug matarong.

P: Angay ug matarung gayud, sibo ug makaluwas, kanunay ug sa tanang dapit nga magpasalamat kami kanimo, Ginoo, santos nga Amahan, labawng makagagahom ug walay-kinutubang Diyos.

Kay kami nasayud nga kini imoha sa imong walay kinutuban nga himaya, nga ikaw mitabang sa mga binuhat nga mamatay uban sa imong pagkabalaan ug imo man ganing gihulma ang tambal nga gikan gayod sa kamatayon mismo, nga ang hinungdan sa among pagkapukan mahimong mga kasangkapan sa among kaluwasan, pinaagi kang Kristo among Ginoo.

Pinaagi kaniya ang panon sa mga Anghel nagdayeg sa imong pagkahalangdon ug nagmaya sa imong presensya sa kahangturan. Hinaut nga ang among mga tingog, kami naga-ampo, makig-uban kanila sa usa ka koro sa masadyaong pagdayeg, sa pagmantala:

Santos

K: Santos, Santos, Santos nga Ginoo, Dios sa kagahaman. Puno ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.

Pag-ampo sa Eukaristiya

(Human sa konsagrasyon, ang aklamasyon:)

P: Kini ang misteryo sa pagtoo.

K: Luwasa kami, Manluluwas sa kalibutan, kay pinaagi sa imong Krus ug Pagkabanhaw imo kaming gihatagan sa kagawasan.

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

K: Amen.

Rito sa Pangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

K: Amahan namo, nga anaa sa mga langit, pagdayegon ang imong ngalan, umabot kanamo ang imong gingharian, matuman ang imong pagbuot dinhi sa yuta maingon sa langit. Ang kalamon namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonoo luwasa kami sa dautan.

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

K: Kay imo man ang gingharian/ ug ang gahom ug ang himaya/ hangtod sa kahangturan.

P: Ginoong Jesukristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tanawa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

K: Amen.

P: Ang kalinaw sa Ginoo sa kanunay maanaa kaninyo.

K: Maanaa usab kanimo.

P: Ipakita ta ang atong panaginigsoonay.

Kordero sa Dios

K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.

Pangalawat

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: Ginoo, dili ako angay nga mokalawat kanimo, apan ipamulong lamang ug mamaayo ako.

Antipona sa Pagpangalawat:

Bisan ug daghan, kita usa ka tinapay, usa ka lawas, kay kitang tanan nakig-ambit sa usa ka Tinapay ug sa usa ka kalis.

Pag-ampo Human sa Pangalawat

P: Mag-ampo kita: Itugot kanamo, labing gamhanang Dios, nga kami unta mabag-o ug maamumahan pinaagi sa Sakramento nga among nadawat, aron mahulma kaming susama sa among gikaon. Pinaagi ni Kristo among Ginoo.

K: Amen.

Katapusang Panalangin:

P: Ang Ginoo maanaa kaninyo.

K: *Maanaa usab kanimo.*

P: Moduko kita ug atong dawaton ang bendisyon sa Ginoo: Ihatag ang pagdaghan sa langitnong grasya alang sa imong magtotoo, O Ginoo; nga unta sila magdayeg kanimo sa ilang mga ngabil, sa ilang mga kalag, sa ilang mga kinabuhi; ug tungod kay pinaagi sa imong gasa nga kami anaa pa, unta ang among tibuok kinabuhi maimoh. Pinaagi kang Kristo among Ginoo.

K: *Amen.*

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

K: *Amen.*

Pagpanglakaw

P: Panglakaw kamo sa pakigdait, diha sa paghiguma sa Dios ug pag-alagad sa katawhan.

K: *Salamat sa Dios.* ■

Ubani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang **gospelbreak.wordpress.com**. o pinagi sa inyong smartphone o tablet i-swiipe kini nga QR code.



**Ang Simbahan
sa Kabus,
pinaagi sa
Gagmayng
Simbahanong
Katilingban,
maka-ambit
gayud pag-ayo
sa pungkay sa
kinabuhing
Kristiyano
pinaagi sa
buhat sa
kagawasan sa
Kabus!**

Please help us continue publishing this Missalette with your donation.

Any amount is appreciated
no matter how small.

Thank you!

Account Name:

Communication Foundation for Asia
Metrobank V-Mapa, Sta. Mesa,

Manila Branch:

SA# 3306-509-480

BDO Old Sta. Mesa Road, Manila Branch:

SA# 7090-042-836

Please fax deposit slip to 713-2736
We are located at # 4427 Old Sta. Mesa St.,
Sta. Mesa, Manila